

Qui illecques grant piece furent,  
 Deux mil ans, avant que coppez  
 Fussent ne d'ilecques ostez.  
 Passez estoient deux mil an  
 Ainz qu'on fondast Jherusalem;  
 Ou tamps Abraham, ne doubtiez mie,  
 Fut Jherusalem commencié;  
 Après cellui commencement  
 Furent puis deux mil ans et cent,  
 Avant que roy David regnast  
 Ne Jherusalem gouvernast.  
 Commencié fut ou tamps David  
 (Comme je le treuve en escript)  
 Le temple, mais non à son mis;  
 Tres bien le commença Davidz,  
 Mais Dieu ne vault qu'il le parfist,  
 Mais à Salomon le commist;  
 La causé en orez cha avant,  
 Se vous lisiez bien ce romant.  
 D'Ebron jusque(s) en Jherusalem  
 Une journee comptoit l'en,  
 La furent les arbres portez  
 Qui sur Adam furent coppez,  
 Qui par la bouche issus lui yerent,  
 En la cité les emmenerent;  
 Le moyen fut beaulx et longs,  
 Le mendre ne portast uns homs;  
 Au temple faire fut bailliez,  
 En pluseurs lieux fut il tailliez;  
 Par tous lieux le peult on tenir,  
 Mais à nul lieu ne polt venir;  
 (Ou) estoit trop court, trop long, trop lez  
 Par despit fut il hors jettez  
 En une rue orde et puans,  
 Bien y fut aprez ce mil ans  
 En un vieulx fossé en ruine,  
 Jusqu'au temps Sebille royne  
 Qui pour un jour illec aloit